

Lettre Jèrriaise- Clive Jone- Octobre 2024

Tchi muchit m'n Abbaye?

Bouônjour bouonnes gens. Ch'est Clive Jones tch'a l' pliaïsi d'vos présenter la lettre Jèrriaise aniet.

Au c'menchement du mais d' Juillet ma bouônnefemme et mé viagînmes à Dinan. J' connaissons bein la ville, car duthant vîngt ans j'eûnmes eune maïson s'gondaithe prés du châté en ruines dé La Hunaudaye, pon liain d' Jugon Les Lacs.

L'întention d' not' visite 'tait d'acater du vîn. J' découvînmes un bouôn vendeux à Dinan au même temps qu' j'acafînmes not' maïson. Lé bisnesse a 'té managi par la même fanmil'ye dépis trais généthâtions et achteu lé directeu est lé p'tit-fis Vincent.

Vincent a eune bouonne sélection d' vîns dé toutes variétés et il les vend à des prix hardi raisonnabl'yes. Si j' veurs offri un bouôn vîn d' France à mes anmîns en Jèrri, j' peux l'acater à miyeu marchi siez Vincent.

Mais auprès aver acaté lé vîn, tchi faithe ?

lun des livres qué j'avons gardé auprès la vente dé not' maïson en Brétangne 'tait « la Route des Abbayes en Brétangne » par Mess. Décanoux et Berthier l'y'a un tas d' abbayes en Brétangne, tchiques-eunes tréjous actives, d'autres en décreu.

J'décidînmes à cherchi et à visiter trais d' ches abbayes : Paimpont, Saint-Méen-Le- Grand et Montfort-sur-Meu.

À Paimpont nou peut vaie la traisième abbaye sus ch't' empliachement. Eune abbaye fut fondée ichîn à côté du lac dans lé septième siècl'ye . Dêtruite par les Nouormands ou fut èrbâtie au neuvième siècl'ye et dans lé treizième siècl'ye l'abbaye que j'pouvons vaie aniet fut créée.

L'allée dé ch't' églyise est pus êtraite qué j'avais attendu mais i' y' a des belles verrines, spécialement eune belle rosace du dgiêx-neuvième siècl'ye.

Par contraste l'abbaye dé Saint-Méen, pon liain d'la bouaïs'sie d' Brocéliande , auve ses légendes dé Merfîn, a eune allée hardi large : deux fais pus large qu'à Paimpont, j' crais.

L'abbaye fut fondée au siêxième siècl'ye par Saint-Mewan (pus tard, Saint Méén) un Saint celtique tchi 'tait acti au Pays d'Galles, en Cornouaille et en Brétangne. Lé bâtisse d'vînt sétchulyi dans l'mitan du seizième siècl'ye et à la fin du dgiêx-huitchième siècl'ye ou louogit la « gendarmerie », des berrexes et eune êcole. L'abbaye lyi-même d'vînt l'églyise pârouaïssiale.

Mais l' pus grand d'sappoiment 'tait not' visite pliannée à l'abbaye dé Montfort-sur-Meu, fondée en 1152 par Dgilliaume 1^{er} dé Montfort. Duthant pus d' trais siécl'yes ou prospéthit souos la protection d' la fanmill'ye de Montfort , mais en 1976 eune brûllie détruihit la plûpart dé l'abbaye. Raîque l'encliôtuthe et l' cõtchiéthe (dé d'avant) restent aniet.

Mais où'est qu'il est? Duthant deux jours j'avons cachi à l'entou dé Montfort , j'avons pâlé ès gens, et èrchèrchi des sîngnes – rein !

Tchi muchit m'n abbaye?

J' vos promets, la préchaine fais qué j'ai bésouain d' vîn acouo eune fais, j'm'en vais dêcouvri les restes dé l'abbaye d' Montfort – malgré l's habitants d' Montfort ?

Mèrcie dé m'aver êcouté mes bouonnes gens.